

Simadanza ta tene show den Cas di Cultura



ORANJESTAD(AAN): -- Simadanza a tene riba Diasabra ultimo, su show "Un siman cu Simadanza".

E show aki tabata bao direccion di Astrid Salazar y Ina Profeet y a tuma lugar na Cas di Cultura.

E tabata parti den siete pida, cada uno representando un dia di siman.

Cada dia tabata tin su tema y su bailenan.

Dialuna por ehempel, tabata tin como tema "Bon Siman" cu su bailenan "Ata bo corant", "Mi gusta bay school" y "Laba Paña".

Direccion general di e show tabata den man di Astrid Salazar, director di Simadanza.

Hunto cu Ina Profeet y invitado Arlene Newhouse, señora Salazar ta responsable tambe pa coreografia di e bailenan.

E pañanan a wordo diseña pa Tighe Costumes y coreografonan Salazar y Profeet, consehero tabata John Fingal.

Tecniconan tabata Richard Hopmans, Roland Bryson y Eduardo Thiel, grabacion di musica tabata den man di Marcel Ho-Kang-You.

Simadanza ta gradici su alumnonan y nan mayornan pa nan apoyo y cooperacion.

Palabranan di gradicemento ta bay tambe na Chela Lesire, Watti Chai, Marcel, Bea y Janice Ho-Kang-You, John Fingal, Ruben Garcia, Joyce Pereira, Vivi Ruiz, Lai Ping Cheong y Blanca Mansur.

Mas leu, e school di baile ta gradici UNOCA y su sponsornan y tur hende cu a yuda na un manera o otro tras di cortina pa e show bira realidad.


Simadanza ta gradici alavez su alumnonan Deyanira Frank, Marielle Ho-Kang-You, Jaclyn de Kort, Kimberly Milan y Jill Mathew, kendenan a tuma despedida pa bay studia den exterior.

E school di ballet y baile folclorico Simadanza a habri su portanan riba 4 di Augustus 1975 y ta situa na Cunucu Plaza den Fergusonstraat.

Su dirigentenan Astrid Salazar y Ina Profeet a studia na Academia di Baile na Rotterdam.

Señora Salazar ta specializa den ballet moderno y clasico y tabata forma parti di e grupo di baile famoso di Katherine Dunham.

Señora Profeet ta specializa



den jazzdance y den duna les na mucha chikito.

Coreografo invita Arlene Newhouse ta naci na Aruba y tabata alumno di Astrid Salazar tempo e tabata mucha.

El a studia pa docente di

baile na San Francisco Conservatory of Ballet and Theatre Arts.

Na 1986, el a funda un school di baile pa mucha yama "Regina Ballet" na St. Maarten, na unda e tabata asistente director tambe di

"Motiance Dance School".

El a bolbe San Francisco na 1993 unda e ta asistente director di "Pacific Dance Theatre".

Riba fotonan hunto cu articulo, momentonan durante e show di Simadanza.